

**KOMISIJA ZA PRIPREMANJE PRIJEDLOGA ZA IZBOR U NAUČNO-NASTAVNO  
ZVANJE DOCENT/ICA NA NAUČNOJ OBLASTI GRAĐANSKO PRAVO I  
GRAĐANSKO PROCESNO PRAVO**

UNIVERZITET U SARAJEVU  
PRAVNI FAKULTET

Broj: 01-1112/23

Datum; 26. 6. 2023 god.

Sarajevo, 23.06.2023. godine

**NASTAVNO-NAUČNOM VIJEĆU PRAVNOG FAKULTETA UNIVERZITETA U  
SARAJEVU**

**Predmet:** Izvještaj Komisije za pripremanje prijedloga za izbor u naučno-nastavno zvanje docent/ica na naučnoj oblasti Građansko pravo i građansko procesno pravo

**Podaci o objavljenom konkursu i formiranju komisije**

a) Univerzitet u Sarajevu – Pravni fakultet, na osnovu usvojenog dinamičkog plana potreba za raspisivanjem konkursa za izbor u zvanja u akademskoj 2022/2023. godini, raspisao je konkurs za izbor/napredovanje jednog saradnika u zvanje docenta/ice na naučnoj oblasti Građansko pravo i građansko procesno pravo. Konkurs je objavljen u dnevnom listu „Dnevni avaz“ i na web-stranicama Univerziteta u Sarajevu (dalje: UNSA) i Univerziteta u Sarajevu - Pravnog fakulteta (dalje: Fakultet) dana 19.04.2023. godine. U roku za podnošenje prijave na konkurs (15 dana od dana objavljivanja) prijavio se jedan kandidat za izbor u zvanje docenta.

b) Na osnovu člana 123. Zakona o visokom obrazovanju Kantona Sarajevo (Službene novine Kantona Sarajevo, br. 36/22 - dalje: ZVO) Nastavno-naučno vijeće Pravnog fakulteta Univerziteta u Sarajevu je na XLV (elektronskoj) sjednici održanoj 07.06.2023. godine donijelo Odluku o imenovanju Komisije za pripremanje prijedloga za izbor jednog saradnika/ice u zvanje docenta/ice na naučnoj oblasti Građansko pravo i građansko procesno pravo (dalje: Komisija) u sastavu:

1. Prof. dr Meliha Povlakić, redovna profesorica Univerziteta u Sarajevu – Pravni fakultet, izabrana na naučnoj oblasti Građansko pravo i građansko procesno pravo, Predsjednica
2. Prof. dr Darja Softić Kadenić, Univerziteta u Sarajevu – Pravni fakultet, izabrana na naučnoj oblasti Građansko pravo i građansko procesno pravo
3. Doc. Dr. Selma Mezetović Međić, Univerziteta u Sarajevu – Pravni fakultet, izabrana na naučnoj oblasti Građansko pravo i građansko procesno pravo

c) Na osnovu Odluke Nastavno naučnog vijeća Pravnog fakulteta Univerziteta u Sarajevu o imenovanju Komisije za pripremanje prijedloga za izbor broj: 01-1000-1/23 od 07.06.2023. godine, zadatak Komisije je da podnese pisani Izvještaj sa prijedlogom Nastavno-naučnom vijeću Univerziteta u Sarajevu – Pravnog fakulteta u Sarajevu u roku od 30 dana u skladu sa tekstom raspisanog konkursa.

d) Nakon što je razmotrila prijavu i priloženu dokumentaciju prijavljenog Kandidata, Komisija u skladu sa odredbama članova 124. ZVO i člana 205. Statuta Univerziteta u Sarajevu iz 2018. (dalje: Statut ) podnosi slijedeći

## I Z V J E Š T A J

### 1. Prijava Kandidata

Na osnovu pisane potvrde Sekretara Pravnog fakulteta Univerziteta u Sarajevu broj 01-1047/23 od 13.06.2023. Komisija konstatira da se na konkurs za izbor/napredovanje jednog saradnika/ice u zvanje docenta/ice na naučnoj oblasti Građansko pravo i građansko procesno pravo prijavio samo jedan Kandidat, i to:

1) Dr Nasir Muftić, LL.M.

Prijava na konkurs je zavedena pod brojem 01-737/23 od 20.04.2023. godine na protokolu UNSA – Pravnog fakulteta. Kandidat je uz prijavu dostavio slijedeću dokumentaciju:

- 1) Biografija (*Curriculum Vitae*) u elektronskoj i printanoj formi,
- 2) Ovjerenu kopiju diplome dodiplomskog studija od 05.11.2016.
- 3) Ovjerenu kopiju diplome master studija od 23.06.2017.
- 4) Uvjerenje o završenom trećem ciklusu studija od 05.04.2023. (ovjerena kopija)
- 5) Uvjerenje o položenim ispitima na trećem ciklusu studija (ovjerena kopija)
- 6) Nagrada Zlatna značka Univerziteta u Sarajevu (ovjerena kopija)
- 7) Nagrada Univerziteta u Sarajevu za rezultate naučnog/umjetničkog rada u 2021. godini (ovjerena kopija) ,
- 8) Druga dokumentacija o stečenom obrazovanju (potvrde i certifikati će biti navedeni na mjestima na kojima budu razmatrani)
- 9) Doktorat
- 10) Spisak objavljenih radova kao i same radove (radovi će biti navedeni i ocijenjeni pod 3.1.);

Potvrdu o radnom stažu i zaposlenju na Fakultetu Kandidat nije dostavljao budući da se nalazi u službenoj evidenciji Fakulteta, kao i uvjerenje o državljanstvu i rodni list, te je Komisija izvršila direktno uvid u ovu dokumentaciju, shodno članu 14. Zakona o upravnom postupku FBiH (Službene novine FBiH, br. 2/1998, 48/1999 i 61/2022).

Prijava Kandidata je blagovremena i potpuna, te je Komisija u skladu sa zakonskim i statutarnim odredbama vrjednovala ispunjenost uvjeta za izbor u zvanje docenta za naučnu oblast Građansko pravo i građansko procesno pravo.

## **2. Biografski podaci, obrazovanje, stečena zvanja, zaposlenje**

### **2.1. Biografski podaci i obrazovanje**

Kandidat je rođen 13.06.1994. godine u Sarajevu; gdje je završio osnovno i srednje školovanje (Treća gimnazija u Sarajevu).

Kandidat je I ciklus studija upisao 2012. i završio 10.06.2016. na Univerzitetu u Sarajevu – Pravnom fakultetu, sa prosječnim ocjenama 9.83 i ocjenom 10.00 na predmetima naučne oblasti, zbog čega je na I ciklusu studija bio odlikovan posebnim priznanjem „Zlatna značka Univerziteta u Sarajevu“.

Drugi ciklus je Kandidat u toku 2016. i 2017. studirao na Central European University, Budimpešta, master studij LL.M. International Business Law, koji je okončao odbranom magistarskog rada pod naslovom „Cramdown in Chapter 11 of the US Bankruptcy Law: Lessons for Bosnia and Herzegovina“. Prema diplomi CEU on je master studije iz oblasti međunarodnog poslovnog prava završio sa izuzetnim uspjehom. U toku II ciklusa studija ostvario je prosječnu ocjenu 3,62 (od maksimalne ocjene 4), pri čemu je prosječna ocjena grupe bila 3,37. Postupak priznanja inostrane diplome je okončan akademskim i stručnim priznavanjem diplome CEU.

Kandidat je odbranom doktorata uspješno okončao III ciklus studija na Univerzitetu u Sarajevu – Pravnom fakultetu, Građanskopravni smjer, gdje je u toku studija ostvario prosječnu ocjenu 10.00. Dana 14.02.2023. uspješno je na engleskom jeziku odbranio doktorsku disertaciju pod naslovom „The impact of artificial intelligence on civil law with the special focus on liability“ (Utjecaj umjetne inteligencije na građansko pravo sa posebnim fokusom na odgovornost) pod mentorstvom prof. dr. Christiane Wendehorst, Univerzitet Beč – Pravni fakultet i komentorstvom prof. dr. Melihe Powlakić.

### **2.2. Stečena znanja**

Kandidat je položio pravosudni ispit (26.08.2021.).

Kandidat odlično govori engleski jezik, o čemu ne dostavlja dokaz (navodi da je znanje u svim segmentima na nivou C1), ali o ovome svjedoči činjenica da je uspješno apsolvirao master studije na engleskom, odbranio master tezu na engleskom, te da je napisao i odbranio doktorsku disertaciju na engleskom jeziku. Osim toga, Kandidat je i sudski tumač za engleski jezik. Kandidat navodi da poznaje njemački jezik (nivo B2), o čemu nije dostavio dokaz, ali je Komisiji ovo poznato.

Uspješno je završio program cjeloživotnog učenja u oblasti pedagoškog obrazovanja i jačanja kompetencija akademskog osoblja Univerziteta u Sarajevu koji se vrednuje sa 6 ECT S.O ovome Kandidat nije dostavio pismene dokaze, ali su članice Komisije, kao predmetne nastavnice sa time upoznate.

Kandidat je apsolvirao i neke druge treninge i programe, ali će to biti razmatrano u okviru doprinosa procesu internacionalizacije.

### **2.3. Zaposlenje**

Kandidat je na Univerzitetu u Sarajevu – Pravni fakultet radni odnos zasnovao 16.07.2018. godine u okviru programa „150+“ .

U svojstvu asistenta je proveo jedan izborni period, a u zvanje višeg asistenta je izabran odlukom Senata 01-4-1/22 od 30. 03. 2022. godine.

### **3. Ocjena ispunjenosti uvjeta Kandidata za izbor u naučno-nastavno zvanje docent**

U skladu sa članom 112. stav 2. lit d) ZVO uvjeti za izbor su: naučni stepen doktora u datoj oblasti (3.1.), minimalno tri naučna rada objavljena u priznatim publikacijama, od čega je jedan naučni rad objavljen u publikaciji relevantnim naučnim bazama podataka (3.2.). Članom 112. stav 3. ZVO je propisano da će Statutom i općim aktom, a u skladu sa Smjernicama iz člana 116. ZVO, visokoškolska ustanova utvrditi posebno vrednovanje za dodatne oblasti prilikom izbora u akademska zvanja i to u pogledu nastavničkih sposobnosti (3.3.), doprinosa u procesu internacionalizacije (3.4.) i društvenog doprinosa (3.5.). Navedene smjernice niti opći akt još nisu usvojeni ali je član 112. stav 3. u određenoj mjeri precizirao relevantne kriterije za izbor, te će se ovaj izvještaj time rukovoditi.

#### **3.1. Naučni stepen doktora nauka u datoj oblasti**

Dana 14.02.2023. godine kandidat je odbranio doktorsku disertaciju pod nazivom: „The impact of artificial intelligence on civil law with the special focus on liability“ (Utjecaj umjetne inteligencije na građansko pravo sa posebnim fokusom na odgovornost).

Doktorska disertacija je napisana na 293 stranice teksta, bez slika i grafičkih prikaza, sa proredom 1,5, Times New Roman, font 12. Od navedenog broja stranica dvije su stranice naslovne, sadržaj je napisan na 3 stranice, a bibliografija na 57 stranica. Tekst doktorske disertacije sadrži 707 fusnota u vidu bilješki ispod teksta bibliografske, deskriptivne i upućujuće prirode. Za obradu teme, prema popisu u literaturi, korišteno je 136 knjiga, monografija i udžbenika i 108 članaka i 23 zakonska teksta. Osim navedenog, u radu je korišteno 107 bibliografskih jedinica koje ne spadaju u prethodno navedene kategorije. Kandidat je koristio najrecentniju literaturu iz ove oblasti koja je dominantno na engleskom jeziku, kao i najvažnije rasprave i drugi izvori.

Rad je sem uvida i zaključka podijeljen na pet dijelova.

U pogledu strukture, potrebno je naglasiti da je rad lako pregledan i da su poente autora jasne i dobro elaborirane. Svako od pet poglavlja predstavlja posebnu cjelinu i logički proizilazi jedno iz drugoga. Svako poglavlje sadrži uvod i zaključak, što omogućava čitaocima da pojedine dijelove kojima se autor bave tretiraju kao jednu cjelinu.

Prvo poglavlje je uvod u problematiku umjetne inteligencije i izazova koje ona predstavlja za građansko pravo. Ono nudi objašnjenje ove tehnologije, prenoseći kompleksne pojmove na jezik razumljiv pravnicima koji često nisu upoznati sa tehničkom pozadinom. Osim toga, ono predstavlja i karakteristike umjetne inteligencije koje su bitne za pitanje građanskog prava, a naročito pitanje odgovornosti, kao što su autonomija, značaj podataka, netransparentnost itd. Stoga, ovaj dio predstavlja svojevrsnu taksonomiju i temelj cjelokupne analize koja se provodi u daljim poglavljima. Osim toga, ovaj dio omogućava uvid u pravni sistem Bosne i Hercegovine koji se kasnije detaljno analizira, kao i uvid u najznačajnija legislativna dostignuća u Evropskoj uniji. Kandidat je predstavio temeljne probleme koje umjetna inteligencija donosi u građanskom pravu. U prvom redu, to su pitanje odvajanje volje ove tehnologije od osobe koje su njeni vlasnici, korisnici ili koje učestvuju u njenoj proizvodnji. Osim toga, mogućnost obavljanja složenih kalkulacija i donošenja kompleksnih odluka tako što se uvažava ranije iskustvo je novost za ljudske kreacije. Svi ovi problemi, kao što autor disertacije ističe, dovode u pitanje mogućnost shvatanja autonomije volje pojedinaca u građanskopravnom odnosu. Dakle, šire pitanje je da li se umjetna inteligencija može smatrat alatom ili nečim što podriva suštinu autonomije volje. Osim toga, autor ističe i da ova tehnologija utječe na način na koji osobe vrše interakciju u građanskopravnim odnosima. U prvom redu, postavlja se pitanja utjecaja ove tehnologije na ravnopravnost strana. Ona koja koristi umjetnu inteligenciju je nesumnjivo u boljem položaju zbog mogućnosti da brzo i sofisticirano analizira velike količine podataka. Međutim, budući da nije isključena mogućnost za njenu široku primjenu, strane koje su tradicionalno inferiorne, kao što su potrošači, mogu imati šansu kroz upotrebu ove tehnologije. Svakako, utjecaj umjetne inteligencije na građansko pravo je veliki diskurs koji prevazilazi obim jedne doktorske disertacije, ali autor daje pregled osnovnih problema i njihovih uzroka koji će imati daleko širi značaj koji prevazilazi pojedine discipline unutar građanskog prava.

Drugo poglavlje je posvećeno odgovarajućem regulatornom pristupu koji treba primijeniti na umjetnu inteligenciju. Ovo poglavlje je posvećeno pružanju šireg konteksta u kojem je potrebno razmatrati probleme građanskog prava. Prvo će se baviti ulogom sistema odgovornosti u širem pravnom sistem i ciljevima koje on treba da postigne. Zatim, ovo poglavlje ispituje odgovarajući nivo na kojem je poželjno donošenje pravila i odgovarajuće vrijeme u kojem je to potrebno učiniti. Dalje se elaborira pitanje adekvatnosti opštih ili sektorskih pravila. Konačno, ovo poglavlje adresira i pomoćne mehanizme izvan građanskog prava koji bi mogli

biti od pomoći, kao što su osiguranje, uspostavljanje standarda sigurnosti proizvoda, kompenzacijski fondovi itd.

Treće poglavlje je posvećeno osnovama odgovornosti. Tu se ispituje način na koji osnovi odgovornosti djeluju u pravu Bosne i Hercegovine. Zatim se predstavljaju izazovi za svaki od njih, uz pojedinačno ispitivanje adekvatnosti za objektivnu i subjektivnu odgovornost, odgovornost za proizvod i odgovornost za drugoga. Analiza također razmatra prijedloge koji trenutno postoje u literaturi. Kao i u prethodnom poglavlju, daje se i prikaz historijskog razvoja primjena osnova odgovornosti na nove tehnologije i motive koje su zakonodavci imali u vidu, kako bi se isti mogli primijeniti na umjetnu inteligenciju.

Četvrto poglavlje je posvećeno alociranju odgovornosti. Ono postavlja konceptualni problem koji umjetna inteligencija donosi, a koji se odnosi na njenu autonomiju i gubitak kontrole od strane korisnika. Ovo poglavlje razmatra principe na osnovu kojih pravo tradicionalno alocira odgovornost i razmatra njihovu adekvatnost za pitanje umjetne inteligencije. Također, ovo poglavlje razmatra dostupne ideje za prevazilaženje ovog problema koji su prisutni u zakonodavnim i drugim aktima, kao i literaturi.

Peto poglavlje analiza poziciju osobe koja je pretrpjela štetu od strane umjetne inteligencije. Prvi dio je posvećen elaboraciji zbog čega bi općenito, ali i specifično u pravu Bosne i Hercegovine, njena pozicija mogla biti gora nego što je slučaj u klasičnim štetnim događajima. Autor analizira specifične probleme koji se odnose na pitanje pristupa dokazima, povećanju troškova za oštećenu stranu, potrebu za posjedovanjem posebnog stručnog znanja, te probleme standarda i tereta dokazivanja. Osim toga, autor nudi prijedloge za tumačenje domaćeg prava koje bi išlo ka izjednačavanju pozicija strana u ovakvim civilnopravnim odnosima.

Disertacija je pisana izvorno na engleskom jeziku, što je izazovan zadatak s obzirom na potrebu preciznog izražavanja i visoku stručnost pitanja kojima se disertacija bavi. Kandidat se uspješno nosio i sa ovim izazovom.

U pogledu izvornog naučnog doprinosa ove disertacije Komisija za doktorat je konstatirala da je Kandidat, izabравši temu utjecaja vještačke inteligencije na građansko pravo, pred sebe postavio veoma izazovan zadatak iz više razloga: radi se o relativno novoj temi, o multidisciplinarnoj temi, o temi koja još nije znanstveno pobrađena u BiH, pa i regionu, odnosno predmetom analize nije bio utjecaj umjetne inteligencije na građansko pravo. Razvoj umjetne inteligencije i digitalnih tehnologija je rapidan i često nepredvidiv, što predstavlja veliki izazov za istraživače koji se konstatno moraju upoznavati sa novinama i u skladu sa tim potencijalno mijenjati postavljene premise i zaključke. Kandidat se sa ovim izazovom uspješno izborio. Doktorska disertacija predstavlja studiju o novim i aktuelnim problemima, vezanim za upotrebu informatičkih tehnologija, sa kojima se suočavaju moderni pravi sistemi. Utjecaj modernih tehnologija, kao i različite interpretacije budućnosti koja će biti njima uslovljena, otežavaju naučni pristup ovakvim temama. Ipak, Kandidat je jasno postavio fokus svog rada i ostao je u

domenu naučnog te pretežno na terenu prava, pri čemu tema njegove disertacije nesporno prelazi okvire isključivo pravnih problema.

Po svom karakteru, doktorska disertacija Kandidata je pionirska, budući da je izvjesno prva ovakva disertacija u Bosni i Hercegovini i, koliko je Komisiji poznato, u zemljama bivše Jugoslavije. Ona ispituje podobnost građanskog prava u Bosni i Hercegovini, sa posebnim fokusom na pitanje odgovornosti, u odnosu na izazove koje donosi umjetna inteligencija. Ipak, pored analize prava pozitivnog prava u Bosni i Hercegovini, Kandidat je uspio prikazati i širi kontekst bez kojeg se ova problematika ne bi mogla razumjeti adekvatno. U prvom redu, riječ je o konceptualnim pitanjima i izazovima koje umjetna inteligencija donosi za sve pravne sisteme, na osnovu čega se mogu kreirati konkretna rješenja. Kandidat nudi različite poglede vodećih naučnika i institucija o njima. Osim toga, ova doktorska disertacija prikazuje i razumijevanje problematike regulacije umjetne inteligencije u Evropskoj uniji, što je od posebnog značaja za BiH kao zemlju koja je kandidat za članstvo.

## **3.2. Naučni radovi**

### **3.2.1. Naučni radovi objavljeni do izbora u zvanje višeg asistenta**

Prilikom izbora u zvanje višeg asistenta Kandidat je dostavio slijedeće radove:

- 1) Pravilo apsolutnog prioriteta - pravilo ili izuzetak, Godišnjak Pravnog fakulteta Univerziteta u Sarajevu LXI, 2018.;
- 2) Dostupnost privremenih mjera određenih od strane arbitara u međunarodnoj trgovačkoj arbitraži, Godišnjak Pravnog fakulteta Univerziteta u Sarajevu LXII, 2019;
- 3) Utjecaj Pandemije COVID-19 na privatno-pravne odnose, koautorstvo sa Melihom Povlakić, Darjom Softić Kadenić, Selmom Mezetović Medić, ZIPS 1426, 2020;
- 4) Liability for Artificial Intelligence, zbirka priloga sa konferencije pod nazivom „Zagreb International Conference on the Law of Obligations“, u Digital Technologies and the Law of Obligations (urednici Zvonimir Slakoper, Ivan Tot), Routledge | Taylor & Francis, 2021;
- 5) Treating personal data as property: A solution for digital world?, Međunarodni zbornik radova sa konferencije “Property Law Conference – Challenges of the 21st Century”, Pravni fakultet Univerziteta Union u Beogradu, 2021;
- 6) Mogućnost zloupotrebe prava u postupku javnog nadmetanja za prodaju nekretnina u izvršnom postupku u pravu BiH, koautorstvo sa Melihom Povlakić i Tahinom Herendom, Zbornik Pravnog fakulteta u Zagrebu, 2021, vol. 71. br. 3
- 7) Obavještenje o derogaciji Evropske konvencije za zaštitu ljudskih prava i temeljnih sloboda – pravi put za Bosnu i Hercegovinu? Fondacija Centar za javno pravo, dostupno: [http://fcjp.ba/analize/Nasir\\_Muftic-Obavjestenje\\_o\\_derogaciji\\_Evropske\\_konvencije\\_za\\_zastitu\\_ljudskih\\_prava\\_i\\_temeljnih\\_sloboda%E2%80%93pravi\\_put\\_za\\_BiH.pdf](http://fcjp.ba/analize/Nasir_Muftic-Obavjestenje_o_derogaciji_Evropske_konvencije_za_zastitu_ljudskih_prava_i_temeljnih_sloboda%E2%80%93pravi_put_za_BiH.pdf)
- 8) Pandemija COVID-19 kao test za privatnost, esej napisan za Univerzitet u Sarajevu – Pravni fakultet, dostupan na: <http://www.pfsa.unsa.ba/pf/wp-content/uploads/2020/05/9-Nasir-Mufti%C4%87-LLM.pdf>

- 9) Sacrificing privacy in the fight against pandemics – how far is too far? Examples from Bosnia and Herzegovina and Montenegro, koautorstvo sa Tahinom Herendom, *Balkan Yearbook of European and International Law*, Springer, 2021, dostupan na: [https://link.springer.com/chapter/10.1007/16247\\_2020\\_22?fbclid=IwAR3889i3IZur3FVIsF0sZ-f4tosZmHh8mYH4tH9OeS5H6b3gay\\_G2RzFI8k](https://link.springer.com/chapter/10.1007/16247_2020_22?fbclid=IwAR3889i3IZur3FVIsF0sZ-f4tosZmHh8mYH4tH9OeS5H6b3gay_G2RzFI8k).

#### **Prikazi:**

Pregled prakse Suda Evropske Unije, *Pravna misao*, broj 5-6, 2019. godina;  
Pregled prakse Suda Evropske Unije, *Pravna misao*, broj 7-8, 2019. godina;  
Pregled prakse Suda Evropske Unije, *Pravna misao*, broj 9-10, 2019. godina;  
Pregled prakse Suda Evropske Unije, *Pravna misao*, broj 11-12, 2019. godina.

U vezi sa radovima objavljenim i dostavljenim do izbora u zvanje višeg asistenta, Komisija konstatira da tom prilikom nisu bili sadržajno ocijenjeni, jer oni nisu bili uvjet za izbor, već je samo konstatirano da oni svjedoče o njegovim izuzetno predanom naučno-istraživačkom radu. Budući da su dostavljeni prije prethodnog izbora, Komisija ih ne razmatra niti ovdje kod ocjene minimalnih uvjeta za izbor u više znanje. Ipak, budući da ovi radovi nisu bili uvjet za izbor u vremenu kada su napisani i objavljeni, Komisija konstatira da pet radova objavljeno u inostranstvu (dva u Hrvatskoj, jedan u Srbiji, jedan u Njemačkoj a jedan u engleskoj), da je jedan rad objavljen u hrvatskom časopisu koji se nalazi u relevantnim naučnim bazama podataka (Zbornik Pravnog fakulteta u Zagrebu), da su dva objavljena u publikacijama sa prestižnih naučnih konferencija, a da je jedan objavljen od strane jednog od najuglednijih njemačkih izdavača (Springer).

Od radova objavljenih u BiH, dva su objavljena u publikacijama koje se nalaze u u relevantnim naučnim bazama podataka (Godišnjak Pravnog fakulteta u Sarajevu).

Svi ovi radovi su objavljeni u vremenu dok je Kandidat bio asistent, što Komisija cijeni kao poseban uspjeh.

### **3.2.2. Naučni radovi objavljeni od izbora u zvanje višeg asistenta**

#### **1) Mogućnost zloupotrebe procesnih prava prilikom prodaje nekretnine na trećem ročištu i za cijenu manju od procijenjene vrijednosti, koautori Meliha Povelakić i Tahir Herenda, Godišnjak Pravnog fakulteta Univerziteta u Sarajevu LXIV, 2021.**

Ovaj rad predstavlja nastavak istraživanja koautora navedenog rada o zloupotrebama postupka javnog nadmetanja za prodaju nekretnina. Rezultati prvog dijela istraživanja su objavljeni u Zborniku Pravnog fakulteta Sveučilišta u Zagrebu. U nastavku je kao predmet istraživanja određena prodaja nekretnine na trećem ročištu bez ograničenja cijene, kao i općenito prodaja nekretnine ispod procijenjene cijene i za cijenu nižu od potraživanja čije se namirenje traži, s ciljem da se ispita da li takva rješenja mogu generirati zloupotrebu prava. U radu su analizirana važeća rješenja u BiH. Konstatirano je da treće ročište i mogućnost prodaje bez ograničenja cijene postoji samo u Federaciji BiH. Izvršeno je poređenje sa zakonima određenih zemalja u



regionu (Crna Gora, Hrvatska, Srbija). Česte promjene propisa o izvršenju u zemljama regiona, izmjenjene upravo odredaba o prodaji nekretnine, broju ročišta i minimalnoj cijeni, pokazuju da se radi o veoma osjetljivom pitanju i da i zemlje regiona tragaju za optimalnim balansom između zaštite interesa povjerilaca i izvršenika. Rješenje kakvo je zastupljeno u Federaciji BiH može voditi ozbiljnom oštećenju interesa izvršenika, drugih povjerilaca, oštećenju interesa tražioca izvršenja kao kupca te u konačnici kompromitiranju izvršnog postupka. Navedeno rješenje se u praksi različito primjenjuje. Analiziran je niz odluka u kojima je Ustavni sud BiH odlučivao o povredi Ustavom zajamčenih prava u slučajevima prodaje nekretnine daleko ispod procijenjene vrijednosti. Praksa Ustavnog suda BiH je kritizirana budući da pruža samo djelimičnu zaštitu prava učesnika u postupku. Navedene mogućnosti zloupotrebe mogle bi se otkloniti adekvatnim zakonskim rješenjima i u BiH, što bi osim pravne sigurnosti imalo za efekt rasterećenje sudova i oslobađanje obaveze da sud u svakom konkretnom slučaju ispituje da li postoji zloupotreba procesnih prava, što je posebno zahtjevno jer ne postoji ni jasan zakonski okvir šta bi se smatralo zloupotrebom prava u izvršnom postupku. Zakonodavac ne može zamisliti sve moguće oblike zloupotreba koje se mogu javiti prilikom primjene propisa, pa je dostupnost pravnih instituta koji omogućavaju *ex post facto* uklanjanje zloupotreba u izvršnom postupku potrebna – ali kao suplement, a ne supstitut adekvatnom *ex ante* pravnom mehanizmu. U radu je analizirana relevantna literatura u regiji, izvršena komparativno pravna analiza, analiziran veliki broj odluka redovnih sudova i Ustavnog suda BiH.

Godišnjak Pravnog fakulteta u Sarajevu se indeksira se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline).

## **2) Economic rights of families of missing persons – institutional framework and problems in Bosnia and Herzegovina, Pravna misao, 1-2, 2022.**

Porodice nestalih lica se suočavaju sa nizom poteškoća koje su prouzrokovane nedostatkom voljenih osoba. Kako bi im se na neki način pokušala pomoći i olakšati, u nizu pravnih poredaka u svijetu donesena su rješenja koja im omogućavaju različite zaštitne mehanizme. Članovi porodica nestalih osoba mogu biti nosioci različitih prava. Pored mjera koje za cilj imaju ostvarenje pravde, nužne su i mjere koje za cilj imaju pružanje materijalne podrške i pomoći članovima porodica nestalih osoba, kao što su pravo na novčanu pomoć, školovanje, zapošljavanje i sl. Riječ je, dakle, o korpusu subjektivnih prava koja su u pravilu socioekonomskog karaktera. U ovom je radu autor rada istražio stanje u Bosni i Hercegovini u pogledu osiguranja imovinskih prava porodica nestalih osoba, a poseban je fokus stavio na način na koji se ostvaruju pravo na novčanu pomoć članova porodice i pravo na naknadu štete. Polazeći od postavki tranzicione pravde, rad analizira značaj imovinskih prava i način na koja se ona ostvaruju u BiH. Prije svega, rad predstavlja složeni i nepotpuni pravni okvir za ostvarivanje ovih prava. Dalje, osvrt je dat na karakter prava na novčanu naknadu koju osobe

ostvaruju. Naposljetku, predstavljen je turbulentni put u kojem osobe nastoje ostvariti pravo na naknadu štete u sudskim postupcima.

Ovaj je rad nastao u okviru jednog Projekta Međunarodnog crvenog krsta posvećenog nestalim osobama u BiH u periodu 1992. – 1995. U radu se Kandidat fokusirao na jedno potpuno neistraženo pitanje u našoj doktrini. Budući da je u BiH veliki broj nestalih lica ovaj rad pruža značajan putokaz kako bi se ovo pitanje trebalo urediti u BiH po ugledu na rješenja koja postoje u uporednom pravu.

Pravna misao je najstariji časopis u oblasti prava u BiH, indeksira se u EBSCO Legal Collections.

### **3) Kazne i recidivizam u bosanskohercegovačkom pravu konkurencije: lekcije iz Evropske Unije, koautor Nihad Odošić, Godišnjak Pravnog fakulteta Univerziteta u Sarajevu LXV, 2023.**

Pravo konkurencije poznaje različite instrumente koji se razvijaju kroz vrijeme kako bi odgovorili izazovima moderne privrede. U ovom radu su autori prikazali ključne institute prava konkurencije koji su u vezi sa kažnjavanjem, te analizirati propise koji reguliraju ove oblasti na nivou Evropske unije i Bosne i Hercegovine, sa posebnim osvrtom na kažnjene subjekte i recidivizam u Bosni i Hercegovini. Ovaj rad predstavlja uporedni prikaz instituta recidivizma i programa ublažavanja kazni u pravu Evropske unije i Bosne i Hercegovine. Analiziraju se sličnosti i razlike u propisima ali i njihovoj primjeni. Razlike postoje u obje sfere, što se u slučaju Bosne i Hercegovine ogleda prije svega u nedostatku propisa kojima bi se posebno reguliralo pitanje recidivizma u pravu konkurencije.

Rad ima poseban značaj budući da je usklađenost prava konkurencije u BiH preduvjet za pristupanje BiH Evropskoj Uniji.

Godišnjak Pravnog fakulteta u Sarajevu se indeksira se u međunarodnim referentnim bazama CSA Sociological Abstracts (Proquest), CSA Worldwide Political Science Abstracts (Proquest), a puni tekst je uključen u Central and East European Academic Source (EBSCOhost) i Law Journal Library (HeinOnline).

### **4) Mapiranje odgovora na govor mržnje u Bosni i Hercegovini - izvještaj o situacionoj analizi i mapiranju, studija izrađena uz finansijsku podršku Evropske unije i Vijeća Evrope kroz projekat “Promocija različitosti i jednakosti u Bosni i Hercegovini“ u okviru zajedničkog programa “Horizontal Facility za Zapadni Balkan i Tursku 2019-2022.“, koautori Adnan Kadrić i Chara Bakalis, 2022.**

Studija je izrađena kako bi predstavila pravne mehanizme koji su u Bosni i Hercegovini dostupni u cilju borbe sa govorom mržnje. Studija mapira relevantne aktere koji imaju ulogu u ostvarivanju zaštite ili funkcioniranju pravnih mehanizama koji tu zaštitu omogućavaju. Njih čine vladine i nevladine organizacije, te alati i mehanizmi koji su im dostupni. Doprinos se primarno ogleda u shematskom prikazivanju kompleksnih odnosa koji u takvim interakcijama

egzistiraju u Bosni i Hercegovini. Također, studija identificira nedostatke postojećeg sistema i nudi prijedloge rješenja, što je učinjeno putem prikupljanja informacija i stavova osoba koje učestvuju u ovim procesima.

#### **4) Pregled prakse Suda Evropske Unije**

Od 2023. se ponovo kao redovna rubrika objavljuje pregled prakse Suda Evropske Unije u časopisu Pravna misao. Rubrika na koncizan, informativan ali pravno fundiran način prikazuje posebno relevantne odluke Suda Evropske unije.

\*

\* \*

Težište naučno-istraživačkog rada Kandidata, kako jevidljivo iz doktorata i objavljenih radova, jesu pitanja vještačke inteligencije i njenog utjecaja na građansko pravo, a posebno odštetno pravo, pitanja zaštite temeljnih ustavnih prava kao što su pravo na dom i pravo na privatnost, medijsko pravo a posebno njegovi privatno-pravni aspekti, pitanja zloupotrebe prava, evropsko privatno pravo. Radovi objavljeni od posljednjeg izbora (4) po broju, kvalitetu i vrstama publikacija od kojih su dva objavljena u publikacijama koje se referiraju u relevantnim naučnim bazama, čime su ispunjeni uvjeti iz člana 12. stav 2. lit. d) ZVO.

Ako se tome dodaju i radovi objavljeni u zvanju asistenta (9 radova, od čega tri u časopisima indeksiranim u relevantnim naučnim bazama, petu inostranstvu itd.) evidentno je da se radi o značajnoj i relevantnoj naučno-istraživačkoj djelatnosti Kandidata, koji je za svoj naučni rad u 2021. godini dobio i nagradu Univerziteta u Sarajevu za naučni rad.

U svojoj je prijavi Kandidat naveo i tri rada koja su u pripremi koje Komisija nije mogla cijiniti ali pozitivno ocjenjuje činjenicu da Kandidat istim tempom kao i do sada se bavi naučno-istraživačkim radom.

### **3.3. Pokazane nastavničke sposobnosti**

**U skladu sa članom 112. stav 3. lit. a) prilikom izbora u zvanje ocjenjuju se nastavničke sposobnosti i doprinos, a s obzirom da se Kandidat bira prvi put u nastavničko zvanje Komisija je cijenila samo one kriterije koje je bilo moguće ispuniti u svojstvu asistenta/višeg asistenta i to: kvalitet realizacije nastave na obaveznim i izbornim predmetima, rad sa studentima na vannastavnim aktivnostima; inoviranje nastavnog procesa; učešće u aktivnostima unapređenja nastave i jačanje interkulturalnog iskustva studenata; dodatno opterećenje u nastavnom procesu; učešće u internoj programskoj evaluaciji.**

U studentskim evaluacijama u akademskim godinama 2018/19 do 2021/22 Kandidat je dobio pozitivne ocjene studenata za izvođenje vježbi i drugih oblika nastave. Uključen je u izvođenje

vježbi i konsultacija na predmetima: Uvod u građansko pravo, Stvarno pravo, Nasljedno pravo, Pravna klinika iz međunarodne prodaje robe i arbitražnog prava.

U pogledu rada sa studentima u vannastavnim aktivnostima Komisija posebno ističe višegodišnji angažman kandidata u pripremi tima Pravnog fakulteta u takmičenju iz medijskog prava Price Moot Court, pri čemu je tim Fakulteta u akademskoj godini 2021/22 osvojio prvo mjesto na regionalnim fazama takmičenja za Južnu i Istočnu Evropu i plasirao se za finalno takmičenje Price Moot Court koje se održava na Univerzitetu Oxford. Kandidat je o ovome dostavio certifikate.

U akademskoj godini 2022/23 je bio jedan od trenera i pripremao studente za takmičenje Willem C. VIS International Arbitration moot, što je jedno od najprestižnijih studentskih takmičenja u svijetu, te je ponovo kao jedan od trenera pripremao studente za takmičenje Price Moot Court.

Prateći studente na navedenim takmičenjima doprinio je takođe jačanju interkulturalnog iskustva studenata.

U procesu interne programske evaluacije izradio je silabuse za nove opcione predmete i to Građansko pravo i informacione tehnologije, Medijsko pravo – privatno pravni aspekti, a značajno je doprinio i izradi silabusa za predmet Digitalna imovina.

Jedan je od inicijatora da se organizira Media Law School: Online Freedom of Expression and Assmby, koja je održana u Sarajevu u 14. do 19. septembra 2021. godine, a koju su organizirali OSCE i Pravni fakultet. Kandidat je o ovome dostavio certifikat.

To isto vrijedi i za Media Law School: Freedom of Expression on Social Network: Influential Users aand Prohibited Speech koja je održana u Sarajevu u 21. do 26. septembra 2021. godine, a koju su organizirali OSCE i Pravni fakultet. Na obje škole iz Medijskog prava je bio i predavač. Kandidat je o ovome dostavio certifikat.

### **3.4. Doprinos procesu internacionalizacije**

doprinos procesu internacionalizacije obuhvata međunarodnu mobilnost; učešće u radu tijela koja se bave procesom internacionalizacije na visokoškolskoj ustanovi; učešće u aktivnosti Strategije internacionalizacije visokoškolske ustanove; učešće u kreiranju i realizaciji cikličnog; necikličnih studijskog programa; ljetnjoj/zimskoj školi; mikroakreditivima održanim i na stranom jeziku za strane i domaće studente; prestižnim međunarodnim konferencijama; učešće u uređivačkim odborima međunarodnih časopisa; naučnim i organizacionim odborima međunarodnih konferencija; recenziranju međunarodnih projekata ili međunarodnih naučnih radova ili knjiga/monografija izdanih na stranim jezicima; učešće u radu međunarodnih stručnih/naučnih asocijacija/inicijativa/konzorcija/komisija; učešće u međunarodnim projektnim timovima ili međunarodnim naučnim/profesionalnim mrežama; uređivačkom odboru međunarodnih časopisa; komisijama za izbor na inostranim visokoškolskim ustanovama; mentorstvima na inostranim visokoškolskim institucijama;

realizacija gostujućih predavanja na međunarodnim konferencijama; visokoškolskim institucijama; i međunarodnim udruženjima/asocijacijama.

Komisija je cijenila ono što je bilo moguće ostvariti u zvanju asistenta /višeg asistenta.

### **Međunarodna mobilnost**

10.10.2022. – 20.10.2022.: Erasmus+ training na Univerzitetu Tor Vergata u Rimu

01.08.2022. – 12.08.2022.: Oxford Media Policy Summer Institute, Univerzitet Oxford (dostavljen certifikat o kompletiranju programa)

29.05.2022. – 02/06/2022.: Erasmus+ training na Jagelonskom univerzitetu u Krakovu.

### **Učešće u kreiranju i realizaciji cikličnog; necikličnih studijskog programa; ljetnjog/zimskog školi; mikroakreditivima održanim i na stranom jeziku za strane i domaće studente**

Organizacija dva ciklusa Media Law School (OSCE i Pravni fakultet Univerziteta u Sarajevu) je već pomenuto pod 3.3.

### **Učešće u prestižnim međunarodnim konferencijama**

Nakon podnošenja prijave na konkurs za višeg asistenta Kandidat je ostvario slijedeća međunarodna učešća:

- 10.02.2022.: Gostujući predavač na Paris 1 Panthéon-Sorbonne na master programu za pravnike, predavanje: "Policing speech in Bosnia and Herzegovina - what algorithms should understand";
- 13.02.2022.: Gostujući predavač na European Law Institute (Croatian Hub), predavanje: "Liability for AI" ;
- 23.03.2022. Gostujući predavač na Jagelonskom univerzitetu u Krakovu, predavanje: "Liability for AI";
- 13.05.2022. The Max Planck Law-Tech-Society doktorantski simpozij, predavanje: "General Rules on Liability for AI - Are they Possible Today?" ;
- 26. i 27.05.2022.: Konferencija Sustainable Development – Challenges for the Future in Research, Univerzitet u Osijeku;
- 31.05.2022. Gostujući predavač na Univerzitetu u Zagrebu, predavanje: "Odgovornost za umjetnu inteligenciju";

- 16 i -17.06.2022.: The AIDC/SIRD Young Scholars Conference, Univerzitet u Luksemburgu, predavanje: "Reasonable expectation of privacy in Benedik v Slovenia – interpretation of global privacy standards by the European Court of Human Rights";
- 18.05.2023.: Međunarodni seminar "Digitalizacija u pravu, zaštita privatnosti i automatizacija - DPZPA", Univerzitet u Sarajevu – Pravni fakultet i Institut za kriminologiju Univerziteta u Ljubljani, izlaganje: Briselski efekt i umjetna inteligencija;

01.09.2022. – 2.12.2022. Kompletiran program Artificial intelligence policy organiziran od strane Center for AI and Digital Policy, 2022 (dostavljen certifikat);

- 04.02.2023.: Konferencija "Living Together in the Cities of the Future and the Metaverse" (Živjeti zajedno u gradovima budućnosti i Metaverse), Pravni fakultet NOVA u Lisabonu i WhatNext.Law, prezentacija: "Liability in Metaverse: To Protect Whom and How?";
- 10.02.2023.: Konferencija "Law in the Age of Modern Technologies" (Pravo u dobu modernih tehnologija), Univerzitet u Milanu, prezentacija: "A road to the AI liability framework – a calming storm?".

#### **Učešće u naučnim i organizacionim odborima međunarodnih konferencija**

Organizacioni odbor: 1st and 2nd Zagreb International Conference on the Law on Obligations, koju je organizirala Katedra za pravo Ekonomskog fakulteta Sveučilišta u Zagrebu, mreža za promicanje UNCITRAL, Sekretarijat za 40. godišnjicu CISG, u saradnji sa European Law's Institute Global Private Law SIG.

#### **Učešće u međunarodnim projektnim timovima**

- 2020 – TRENUTNO: Škola medijskog prava - Univerzitet u Sarajevu i OSCE;
- 28/02/2022 – 01/10/2022: Konsultat za projekt - Mapping Responses to hate speech in Bosnia and Herzegovina -a situational analysis and mapping report, Vijeće Evrope;
- 10/2021 – TRENUTNO Bilateralni projekt "Pravo, tehnologija i digitalizacija" Univerzitet u Sarajevu i Univerzitet u Ljubljani.

#### **Učešće u međunarodnim naučnim/profesionalnim mrežama**

Kandidat je član European Law Institute (Beč), Konrad Adenauer Stiftung – alumni grupa, Internet & the Just Society, Center for AI and Digital Policy (Vašington).

### **3.5. Društveni doprinos**

**Shodno odredbi člana 112. stav 3 lit c) društveni doprinos kao kriterij za izbor obuhvata** priznanja i nagrade dobijene od šire društvene zajednice ili visokoškolske ustanove; učešće u savjetodavnim tijelima institucija od šireg društvenog značaja; učešće u nadležnim tijelima/komisijama/grupama/savjetima koje rade na jačanju; planiranju i unapređenju svih procesa u okviru visokoškolskih ustanova; rad na realizaciji aktivnosti vezanih za unapređenje institucije i razvoj zajednice; učešće u izdavačkom/uređivačkom odboru domaćih časopisa; zbornika radova i monografija; organizacionom i naučnom odboru domaćih konferencija; savjetovanja; okruglih stolova; recenzija naučnih radova; knjiga i monografija; rad na oblikovanju javnih politika; konsultantski rad za zajednicu; volonterski rad za visokoškolsku ustanovu i zajednicu; rad na razvojnim projektima; učešće u inicijativama vezanim za ostvarenje globalnih ciljeva održivog razvoja.

Kandidat je dostavio potvrde o slijedećim nagradama i priznanjima:

- Potvrda o Zlatnoj znački Univerziteta u Sarajevu kao jednom od najboljih studenata Pravnog fakulteta u Sarajevu u svojoj generaciji
- Certifikat zahvale od strane OSCE-a i Univerziteta u Sarajevu – pravnog fakulteta izdat za učešće u Školi medijskog prava za 2021. i 2022. godinu.
- Potvrda o nagradi Univerziteta u Sarajevu za rezultate naučnog/umjetničkog rada u 2021. godini.

### **3.6. Ostalo**

#### **Komisije na Fakultet**

Na Fakultetu je bio angažiran u radu više komisija i tijela, a to su: Komisija za sprovođenje ekvivalencije naučnih i stručnih zvanja, Komisija za provjeru uslova u pogledu završetka I ciklusa studija, Odbor za osiguranje kvaliteta, Operator za DL nastavu na Građanskog katedri, Koordinator II ciklusa studija na Građanskog katedri, Izvršni odbor za naučni skup „Razvoj naučnih disciplina na Pravnom fakultetu Univerziteta u Sarajevu“ koja je održana 27.09.2021. godine, izvršni odbor za Tripartitnu naučnu konferenciju o temi „Prednosti alternativnog rješavanja sporova“ koja je održana 06.04.2019 godine, te Popisna komisija u kojoj je, osim u posljednoj godini, učestvovao svake godine provedene na ovom radnom mjestu.

U svim navedenim komisijama i tijelima Kandidat je dao vrijedan doprinos i istakao se svojom predanošću i angažmanom.

## **Zaključna ocjena i prijedlog Komisije**

Na konkurs za izbor jednog kandidata u zvanje docenta/ice na naučnoj oblasti Građansko pravo i građansko procesno pravo prijavio se kao jedini Kandidat dr Nasir Muftić LL.M., viši asistent Univerziteta u Sarajevu – Pravni fakultet.

Na osnovu uvida u relevantnu dokumentaciju i na osnovu činjenica potvrđenih priloženom dokumentacijom, Komisija jednoglasno procjenjuje da je Kandidat dr Nasir Muftić LL.M. sve oblike školovanja završio sa najvišim ocjenama, uključivši i doktorski studij (gdje je ostvario prosječnu ocjenu 10,00), da je dobitnik Zlatne značke Univerziteta za uspjeh na I ciklusu, da je titulu magistra prava stekao na prestižnom Central European University (Budimpešta/Beč), da je doktorat pisao i branio na engleskom jeziku o trenutno najaktuelnijoj temi privatnog prava (vještačka inteligencija i građansko pravo), da je mentorica bila Prof. Dr. Christiane Wendehorts sa Univerziteta u Beču – Pravni fakultet, koja je jedno od vodećih svjetskih imena u oblasti iz koje je pisan doktorat, što je sigurno predstavljalo dodatan izazov i tražilo ulaganje dodatnog napora.

U svojstvu asistenta i višeg asistenta na Univerzitetu u Sarajevu – Pravnom fakultetu obavljao je poslove asistenta/višeg asistenta preciznije vježbe, konsultacije i ispite na obaveznim i izbornim predmetima naučne oblasti Građansko pravo i građansko procesno pravo u periodu od 2018. do danas za šta je ocijenjen visokim ocjenama od strane studenata. Svoj pedagoški i nastavnički angažman dopunio je i višegodišnjim pripremanjem tima Fakulteta za međunarodno takmičenje u oblasti medijskog prava i postigao značajne uspjehe, a ove godine je bio jedan od trenera tima Willem C. VIS International Arbitration moot.

Od dolaska na Fakultet živio je internacionalizaciju akademskog zvanja kroz više naučno-istraživačkih boravaka, učešća u međunarodnim projektima, učešća na konferencijama, simpozijima, seminarima i drugim programima ili je predavao na prestižnim međunarodnim univerzitetima i institucijama (kao što su Jagelonja Univerzitet u Krakovu, Paris 1 Panthéon-Sorbonne, Sveučilište u Zagrebu itd.).

Kao autor i ko-autor objavio je više radova u zemlji i inostranstvu koji po svom sadržaju te vrsti i strukturi publikacija u kojima su objavljeni odgovaraju Zakonom i Statutom utvrđenim uvjetima za naučno-istraživački rad. Komisija odista cijeni da se u tom kontekstu radi o izuzetnom uspjehu. Treba veoma pozitivno ocijeniti ne samo kvantitet radova već i njihov kvalitet. Radovi koji su podložni kategorizaciji su kategorizirani kao izvorni i pregledni znanstveni radovi, a pri tome su objavljeni u uglednim i priznatim međunarodnim i domaćim naučnim i stručnim časopisima. Radovi pokrivaju široku oblast građanskog prava i građanskog procesnog prava. Posebno treba istaći da teme kojima se bavi Kandidat spadaju u najaktuelnije teme građanskog prava danas: utjecaj pandemije COVID-19 na građansko pravo, medijsko pravo, zaštita privatnosti, vještačka inteligencija itd.. Navedeno svjedoči o intelektualnoj radoznalosti kandidata i širokom pravničkom obrazovanju. Za svoj naučni rad dobio je Nagradu Univerziteta u 2021.



Na osnovu navedenog o naučno-istraživačkom angažmanu i pozitivne ocjene o ispunjavanju svih obaveza iz rada i u vezi sa radom na Fakultetu, pozitivnih studentskih evalucija, Komisija je jednoglasno procijenila da Kandidat dr Nasir Muftić LL.M. posjeduje stručne, naučno-istraživačke i pedagoške kvalitete, te da ispunjava sve Zakonom i Statutom tražene uvjete za izbor u naučno-nastavno zvanje docenta na naučnoj oblasti Građansko pravo i građansko procesno pravo na Univerzitetu u Sarajevu – Pravni.

### **Prijedlog:**

Na osnovu prethodno navedenog, Komisija sa zadovoljstvom predlaže da se kandidat dr Nasir Muftić LL.M. izabere u naučno-nastavno zvanje docenta za naučnu oblast Građansko pravo i građansko procesno pravo.

KOMISIJA



Prof. dr Meliha Povlakić



Prof. dr Darja Softić Kadenić



Doc. Dr Selma Mezetović Međić